

INUIT ATAQATIGIIT

INATSISARTUNI



21. august 2015

UKA 2015/43

Inatsisartut suleriaasianni § 33 najoqqutaralugu Inatsisartuni aalajangiiffigisassaq tulliuuttoq saqqummiuppara:

Ukiut qulit 20-illu akornani nuna tamakkerlugu sanaartugassanik pilersaarusiorto-qarnissaanik, minnerpaamik kommuuninut agguataarneqartunik aammalu kommunit suleqatigalugit pilersaarutunik ingerlanneqartussanik Naalakkersuisut peqquneqarnissaanik Inatsisartuni aalajangiiffigisassatut siunnersuut. Sanaartukkanik pilersaarutit Namminersornerullutik Oqartussat aammalu kommunit sanaartornermik suliassaanic imaqartinneqassapput, tamatumani piviusumik tulleriissaarinissat pilersaarusiornissallu kommuunini kiisalu sanaartugassanik suliassinneqartunit ingerlanneqarsinnaalersillugit aammalu suliassaasinnaasunillu kommuunini ingerlanneqartussatut pilersaarutit inissisorneqarsinnaalersillugit.

(Inatsisartunut ilaasorta, Agathe Fontain, Inuit Ataqatigiit)

Tunngavilersuut:

Namminersorlutik Oqartussat ukiut qulit 20-illu akornani siumoortumik sanaartugassat pilersaarusiortarunikkit allaffissornikkut aningaasaqarnikkullu iluaqutissaqaqaaq. Suliariumannittussarsiuineq sanaartornerillu piffissaq eqqorlugu aallartissinnaangussapput, tamanna sanatitsisumut pitsaanerpaassaaq. Sanaartornissanik pilersaarutit siunissami qaninnerusumut pilersaarusiukkat suliniutinut minnernut ilaannut piukkunnartuupput, amerlanerilli suliniutillu annerit pineqartillugit siunissami qaninnerusumut pilersaarusiornerit akinik qaffatitsisinnaapput, navialanernillu amerlanernik imaqarsinnaallutik.

Kommuunit iluameersunik sanaartornissamut pilersaarusiortassagunik ilisimasariaqarpaat Namminersorlutik Oqartussanit sanaartornermik pilersaarutit aningaasaliiffigineqassanersut. Sanaartornermik pilersaarutit aqutsinerillu aningaasaliinissallu pineqartunut kommuuninut tunniunneqarsimappat, kommuunit akisussaaffimmik aqutsinermillu tigummillutik, kommuuninut pineqartunut pitsaanerpaassaaq akikinneralaassallunilu.

Pisortanut aningaasaqarnikkut allaffissornikkullu kingunissai

Naatsorsuutigineqarpoq nuna tamakkerlugu iliuusissanik pilersaarusiornikkut piffissaq ungasinerusumut isigaluni eqeersimaartumik ingerlatsinissat qaffassarneqassasut, tamatuma kingunerisaanik sipaarutissanik pilersitsinissat anguneqarsinnaalersillugit, isumalluutitik atuilluarnerunerit aqutigalugit, tamatuma saniatigut aammattaq sanaartugassanut atortussat assigisaallu akikinnerusumik pisarineqarsinnaalersillugit. Nunatta karsiata isumalluutaat isumatusaarnerusumik atorneqaannaratik, aammattaarli ima atorneqassalutik inuiaqatigiinni nalillit annertunerusut aningaasaliissutaasunit pissarsiarineqarsinnaalissallutik.

Namminersorlutik inuuniutinik ingerlatsisunut aningaasaqarnikkut allaffissornikkullu kingunissai

Ukiuni arlariini nuna tamakkerlugu sanaartornissani iliuusisatut pilersaarusiornerup inuussutissarsiornikkut ingerlatsivinnut pitsaasumik kinguneqassaaq, iliuusisatut pilersaarusiornerup ersarissassammagu pisariaqartitsinerit annertussusaat, aammalu sanaartugassat siunissami qanoq ittut sanaartorneqassanersut. Inuussutissarsiornikkut ingerlatsiviit tamatuma kingunerisaanik ingerlatsinertik qularnaannerusumik aaqqissuussinnaangussavaat, tamatumani ilinniartunik atorfinitsitinerit imaluunniit isumaqatigiissusiornikkut sulersitanik allanik.

Innuttaasunut aningaasaqarnikkut allaffissornikkullu kingunissai

Soqanngilaq.